

(मलिक मोहम्मद जायसी)

आखरी कलाम

पहिले नावँ दैउ कर लीन्हा । जेइ जिउ दीन्ह, बोल मुख कीन्हा ॥
 दीन्हेसि सिर जो सँवारै पागा । दीन्हेसि कया जो पहिरै बागा ॥
 दीन्हेसि नयन जोति, उजियारा । दीन्हेसि देखै कहँ संसारा ॥
 दीन्हेसि स्रवन बात जेहि सुनै । दीन्हेसि बुद्धि, ज्ञान बहु गुनै ॥
 दीन्हेसि नासिक लीजै बासा । दीन्हेसि सुमन सुगंध बिरासा ॥
 दीन्हेसि जीभ बैन रस भाखै । दीन्हेसि भुगुति, साध सब राखै ॥
 दीन्हेसि दसन सुरंग कपोला । दीन्हेसि अधर जे रचै तँबोला ॥

दीन्हेसि बदन सुरूप रँग, दीन्हेसि माथे भाग ।
 देखि दयाल, 'मुहमद', सीस नाइ पद लाग ॥१॥

दीन्हेसि कंठ बोल जेहि माहाँ । दीन्हेसि भुजादंड, बल बाहाँ ॥
 दीन्हेसि हिया भोग जेहि जमा । दीन्हेसि पाँच भूत, आतमा ॥
 दीन्हेसि बदन सीत औ घामू । दीन्हेसि सुख नींद बिसरामू ॥
 दीन्हेसि हाथ चाह जस कीजै । दीन्हेसि कर पल्लव गहि लीजै ॥
 दीन्हेसि रहस कूद बहुतेरा । दीन्हेसि हरष हिया बहु मेरा ॥
 दीन्हेसि बैठक आसन मारै । दीन्हेसि बूत जो उठें सँभारै ॥
 दीन्हेसि सबै सँपूरन काया । दीन्हेसि दोइ चलै कहँ पाया ॥

दीन्हेसि नौ नौ फाटका, दीन्हेसि दसवँ दुवार ।
 सो अस दानि 'मुहमद', तिन्ह कै हौं बलिहार ॥२॥

मरम नैन कर अँधरै बूझा । तेहि बिसरे संसार न सूझा ॥
 मरम स्रवन कर बहिरै जाना । जो न सुनै, किछु दीजै साना ॥
 मरम जीभ कर गूँगै पावा । साध मरै, पै निकर न नावाँ ॥
 मरम बाहँ कै लूलै चीन्हा । जेहि बिधि हाथन्ह पाँगुर कीन्हा ॥
 मरम कया कै कुस्ती भेंटा । नित चिरकुट जो रहै लपेटा ॥
 मरम बैठ उठ तेहि पै गुना । जो रे मिरिग कस्तूरी पहाँ ॥(?)
 मरम पावँ कै तेहि पै दीठा । होइ अपाय भुइँ चलै बईठा ॥

अति सुख दीन्ह बिधातै, औ सब सेवक ताहि ।
 आपन मरम 'मुहमद', अबहूँ समुझ, कि नाहि ॥३॥

भा औतार मोर नौ सदी । तीस बरीस ऊपर कबि बदी ॥
 आवत उधत चार बिधि ठाना । भा भूकंप जगत अकुलाना ॥
 धरती दीन्ह चक्र बिधि लाई । फिरै अकास रहँट कै नाई ॥
 गिरि पहार मेदिनि तस हाला । जस चाला चलनी भरि चाला ॥

मिरित-लोक ज्यों रचा हिंडोला । सरग पताल पवन खट डोला ॥
गिरि पहार परबत ढहि गए । सात समुद्र कीच मिलि भए ॥
धरती फाटि, छात भहरानी । पुनि भइ मया जौ सिष्टि समानी ॥

जो अस खंभन्ह पाइ कै, सहस जीभ गहिराई ।
सो अस कीन्ह 'मुहमद', तोहि अस बपुरे काई ॥४॥

सूरज (अस) सेवक ताकर अहै । आठौ पहर फिरत जो रहै ॥
आयसु लिए रात दिन धावै । सरग पताल दुवौ फिरि आवै ॥
दगधि आगि महँ होइ अंगारा । तेहि कै आँच धिकै संसारा ॥
सो अस बपुरै गहनै लीन्हा । औ धरि बाँधि चँडालै दीन्हा ॥
गा अलोप होइ, भा अँधियारा । दीखै दिनहि सरग महँ तारा ॥
उवतै झप्पि लीन्ह, घुप चाँपै । लाग सरब जिउ थर थर काँपै ॥
जिउ कहँ परे ज्ञान सब झूठै । तब होइ मोख गहन जौ झूटै ॥

ताकहँ एता तरासै जो सेवक अस नित ।
अबहँ न डरसि 'मुहमद' काह रहसि निहचिंत ॥५॥

ताकै अस्तुति कीन्हि न जाई । कोने जीभ में करौं बढ़ाई ? ॥
जगत पताल जो सैते कोइ । लेखनी बिरिख, समुद मसि होई ॥
लागै लिखै सिष्टि मिलि जाई । समुद घटै, पै लिखि न सिराई ॥
साँचा सोइ और सब झूठे । ठावँ न कतहुँ ओहि कै रूठे ॥
आयसु इबलीस हु जौ टारा । नारद होइ नरक महँ पारा ॥
सौ दुइ कटक, कहउ लखि घोरा । फरऊँ रोधि नील महँ बोरा ॥
जौ शदाद बैकुंठ सँवारा । पैठत पौरि बीच गहि मारा ॥

जो ठाकुर अस दारुन, सेवक तइँ निरदोख ।
माया करै 'मुहम्मद' तौ पै होइहि मोख ॥६॥

रतन एक बिधनै अवतारा । नावँ 'मुम्मद' जग उजियारा ॥
चारि मीत चहुँदिसि गजमोती । माँझ दिपै मनु मानिक जोती ॥
जेहि हित सिरजा सात समुंदा । सातहु दीप भए एक बुंदा ॥
तर पर चौदह भुवन उसारे । बिच बिच खंड बिखंड सँवारे ॥
धरती औ गिरि मेरु पहारा । सरग चाँद सूरज औ तारा ॥
सहस अठारह दुनिया सिरैं । आवत जात जातरा करैं ॥
जेइ नहिं लीन्ह जनम महँ नाऊँ । तेहहि कहँ कीन्ह नरक महँ ठाऊँ ॥

सो अस देऊ न राखा, जेहि कारन सब कीन्ह ।
दहुँ तुम काह 'मुहम्मद' एहि पृथिवी चित दीन्ह ॥७॥

बाबर साह छत्रपति राजा । राज पाट उन कहँ बिधि साजा ॥
भुलुक सुलेमाँ कर ओहि दीन्हा । अदल दुनी ऊमर जस कीन्हा ॥

अली केर जस कीन्हेसि खाँड़ा । लीन्हेसि जगत समुद भरि डाँड़ा ॥
 बल हजमा कर जैस सँभारा । जो बरियार उठा तेहि मारा ॥
 पहलवान नाए सब आदी । रहा न कतहुँ बाद करि बादी ॥
 बड परताप आप तप साधे । धरम के पंथ दई चित बाँधे ॥
 दरब जोरि सब काहुहि दिए । आपुन बिरह आउ जस लिए ॥

राजा होइ करै, सब छाँड़ि, जगत महँ राज ।
 तब अस कहैं 'मुहम्मद', वै कीन्हा किछु काज ॥८॥

मानिक एक पाएउँ उजियारा । सैयद असरफ पीर पियारा ॥
 जहाँगीर चिस्ती निरमरा । कुल जग महँ दीपक बिधि धरा ॥
 औ निहंग दरिया जल माहाँ । बूडत कहँ धरि काढत बाहाँ ॥
 समुद माहँ जो बाहति फिरई । लेतै नावँ सौहँ होइ तरई ॥
 तिन्ह घर हौ मुरीद, सो पीरू । सँवरत बिनु गुन लावै तीरू ॥
 कर गहि धरम पंथ देखरावा । गा भुलाइ तेहि मारग लावा ॥
 जो अस पुरुषहि मन चित लावै । इच्छा पूजै, आस तुलावै ॥

जौ चालिस दिन सेवै, बार बुहारै कोइ ।
 दरसन होइ 'मुहम्मद', पाप जाइ सब धोइ ॥९॥

जायस नगर मोर अस्थानू । नगर क नावँ आदि उदयानू ॥
 तहाँ दिवस दस पहुने आएउँ । भा बैराग बहुत सुख पाएउँ ॥
 सुख भा, सोचि एक दिन मानौं । ओहि बिनु जिवन मरन कै जानौं ॥
 नैन रूप सो गएउ समाई । रहा पूरि भर हिरदय कोई ॥
 जहवै देखौं तहँवै सोई । और न आव दिस्टि तर कोई ॥
 आपुन देखि देखि मन राखौं । दूसर नाहिं, सो कासौं भाखौं ॥
 सबै जगत दरपन कै बेखा । आपन दरसन आपुहि देखा ॥

अपने कौकुत कारन, मीर पसारिन हाट ।
 मलिक मुहम्मद बिहनै, होइ निकसिन तेहि बाट ॥१०॥

धूत एक मारत गनि गुना । कपट रूप नारद करि चुना ॥
 'नावँ न साधु' साधि कहवावै तेहि लगि चलै जौ गारी पावै ॥
 भाव गाँठि अस मुख, कर भाँजा । कारिख तेल घालि मुख माँजा ॥
 परतहि दीठि छरत मोहिं लेखे । दिनहिं माँझ अँधियर मुख देखे ॥
 लीन्हे चंग राति दिन रहई । परपँच कीन्ह लोगन महँ चहई ॥
 भाइ बंधु महँ लाई लावै । बाप पूत महँ कहै कहावै ॥
 मेहरी भेस रैनि के आवै । तरपड़ कै पूरुख ओनवावै ॥

मन मैली कै ठगि, ठगै, ठगे न पायौ काहु ।
 वरजेउ सबहिं 'मुहम्मद', असि जिन तुम पतियाहु ॥११॥

अंग चढावहु सूरी भारा । जाइ गहौ तब चंग अधारा ॥
 जौ काहू सौं आनि चिहूँटै । सुनहु मोर बिधि कैसे छूटै ॥
 उहै नावँ करता कर लेऊ । पढौ पलीता धूआँ देऊ ॥
 जौ यह धुवाँ नासिकहि लागै । मिनती करै औ उठि उठि भागै ॥
 धरि बाई लट सीस झकोरै । करि पाँ तर, गहि हाथ मरोरै ॥
 तबहि सँकोच अधिक ओहि होवै । 'छाँड़हु, छाँड़हु!' कहि कै रोवै ॥
 धरि बाहीं लै थुवा उड़ावै । तासौं डरै जो ऐस छोड़ावै ॥

है नरकी औ पापी, टेढ बदन औ आँखि ॥
 चीन्हत उहै 'मुहम्मद', झूठ भरी सब साखि ॥१२॥

नौ सै बरस छतीस जो भए । तब एहि कथा क आखर कहे ॥
 देखौं जगत धुध कलि माहाँ । उवत धूप धरि आवत छाहाँ ॥
 यह संसार सपन कर लेखा । माँगत बदन नैन भरि देखा ॥
 लाभ, दिउ बिनु भोग, न पाउब । परिहि डाढ़ जहँ मूर गँवाउब ॥
 राति क सपन जागि पछिताना । ना जानौ कब होइ बिहाना ॥
 अस मन जानि बेसाहहु सोई । मूर न घटै, लाभ जेहि होई ॥
 ना जानेहु बाढत दिन जाई । तिल तिल घहै आउ नियराई ॥

अस जिन जानेहु बढत है, दिन आवत नियरात ।
 कहै सो बूझि 'मुहम्मद' फिर न कहाँ असि बात ॥१३॥

जबहिं अंत कर परलै आई । धरमी लोग रहै ना पाई ॥
 जबहीं सिद्ध साधु गए पारा । तबहीं चलै चोर बटपारा ॥
 जाइहि मया मोह सब केरा । मच्छ रूप कै आइहि बेरा ॥
 उठिहैं पंडित बेद पुराना । दत्त सत्त दोउ करिहिं पयाना ॥
 धूम बरन सूरज होइ जाई । कृस्न बरन सब सिष्टि दिखाई ॥
 दधा पुरुब दिसि उडहै जहाँ । पुनि फिरि आइ अथइहै तहाँ ॥
 चढ़ि गदहा निकसै धरि जालू । हाथ खंड होइ, आवै कालू ॥

जो रे मिलै तेहि मारै, फिरि फिरि आइ कै गाज ।
 सबही मारि 'मुहम्मद', भूज अरहिता राज ॥१४॥

पुनि धरती कहँ आयसु होई । उगिलै दरब, लेइ सब कोई ॥
 'मोर मोर', करि उठिहैं झारी । आपु आपु महँ करिहैं मारी ॥
 अस न कोई जानै मन माहाँ । जो यह सँचा अहै सो कहाँ ॥
 सैंति सैंति लेइ लेइ घर भरहीं । रहस कूद अपने जिउ करहीं ॥
 खनहिं उतंग, खनहि फिर साँती । नितहि हुलंब उठै बहु बाँती ॥
 पुनि एक अचरज सँचरै आई । नावँ 'मजारी' भँवै बिलाई ॥
 ओहि के सूँघे जियै न कोई । जो न मरै तेहि भक्खै सोई ॥

सब संसार फिराई औ, लावै गहिरी घात ।
उनहूँ कहै 'मुहम्मद' बार न लागिहि जात ॥१५॥

पुनि मैकाइल आयसु पाए । उन बहु भाँति मेघ बरसाए ॥
पहिले लागै परै अँगारा । धरती सरग होइ उजियारा ॥
लागी सबै पिरथिवीं जरै । पाछे लागे पाथर परै ॥
सौ सौ मन कै एक एक सिला । चलै पिंड घुटि आवैं मिला ॥
बजर गोट तस छूटैं भारी । टूटैं रूख बिरुख सब झारी ॥
परत धमाकि धरति सब हालै । उधिरत उठै सरग लौं सालै ॥
अधाधार बरसै बहु भाँती । लागि रहै चालिस दिन राती ॥

जिया जंतु सब मरि घटे जित सिरजा संसार ।
कोइ न है 'मुहम्मद', होइ बीता संघार ॥१६॥

जिबरईल पाउब फरमानू । आइ सिस्टि देखब मैदानू ॥
जियत न रहा जगत केउ ठाढ़ा । मारा झोरि कचरि सब गाढ़ा ॥
मरि गंधाहिं, साँस नहिं आवै । उठै बिगंध, सड़ाइँध आवैं ॥
जाइ देऊ से करहु बिनाती । कहब जाइ जस देखब भाँती ॥
देखहु जाइ सिस्टि बेवहारू । जगत उजाड़ सून संसारू ॥
अस्ट दिसा उजारि सब मारा । कोइ न रहा नावैं लेनिहारा ॥
मारि माछ जस पिरथिवीं पाटी । परै पिछानि न, दीखे माटी ॥

सून पिरथिवीं होइगई, दहूँ धरती सब लीप ।
जेतनी सिस्टि 'मुहम्मद', सबै भाइ जल दीपि ॥१७॥

मकाईल पुनि कहब बुलाई । बरसहु मेघ पिरथिवीं जाई ॥
उनै मेघ भरि उठिहैं पानी । गरजि गरजि बरसहिं अतवानी ॥
झरी लागि चालिस दिन राती । घरी न निबुसै एकहु भाँती ॥
छूटि पानि परलय की नाई । चढ़ा छापि सगरिउँ दुनियाई ॥
बूड़हिं परबत मेरु पहारा । जल हुलि उमडि चलै असरारा ॥
जहँ लगि मगर माछ जित होई । लेइ बहाइ जाइहि भुईँ धोई ॥

सून पिरथिवीं होइहि, बूझे हँसै ठठाइ ।
एतनि जो सिस्टि 'मुहम्मद', सो कहँ गई हेराइ ॥१८॥

पुनि इसराफीलहि फरमाए । फूँके, सब संसार उड़ाए ॥
दौ मुख सूर भरै जो साँसा । डोलै धरती, लपत अकासा ॥
भुवन चौदहो गिरि मनु डोला । जानौ घालि झुलाव हिंडोला ॥
पहिले एक फूँक जो आई । ऊँच नीच एक सम होइ जाई ॥
नदी नार सब जैहै पाटी । अस होइ मिले ज्यों ठाढ़ी माटी ॥
दूसरि फूँक जो मेरु उड़है । परबत समुद्र एक होइ जैहैं ॥

चाँद सुरुज तारा घट टूटै । परतहि खंभ सेस घट फूटै ॥

तिसरे बजर महाउब, अस धुइँ लेब महाइ ।
पूरब पछिउँ 'मुहम्मद', एक रूप होइ जाइ ॥१९॥

अजराइल कहँ बेगि बोलावै । जीउ जहाँ लागि सबै लियावै ॥
पहिले जिउ जिबरैल क लेई । लोटि जीउ मैकाइल देई ॥
पुनि जिउ देइहि इसराफीलू । तीनिहु कहँ मारै अजराईलू ॥
काल फिरिस्तिन केर जौ होई । कोइ न जागै, निसि असि होई ॥
पुनि पूछब जम? सब जिउ लीन्हा । एकौ रहा बाँचि जो दीन्हा ?॥
सुनि अजराइल आगे होइ आउब । उत्तर देब, सीस भुइँ नाउब ॥
आयसु होइ करौं अब सोई । की हम, की तुम , और न कोई ॥

जो जम आन जिउ लेत हैं, संकर तिनहू कर जिउ लेब ।
सो अवतरें 'मुहम्मद', देखु तहुँ जिउ देब ॥२०॥

पुनि फरमाए आपु गोसाईं । तुमहि दैउ जिवाइहि नाहीं ॥
सुनि आयसु पाछे कहँ ढाए । तिसरी पौरि नाँधि नहिं पाए ॥
परत जीउ जब निसरन लागै । होइ बड कष्ट, घरी एक जागै ॥
प्राण देत सँवरै मन माहाँ । उवत धूप धरि आवत छाहाँ ॥
जस जिउ देत मोहिं दुख होई । ऐसै दुखै अहा सब कोई ॥
जौ जनत्याँ अस दुख जिउ देता । तौ जिउ काहू केर न लेता ॥
लौटि काल तिनहूँ कर होवै । आइ नींद, निधरक होइ सोवै ॥

भंजन, गढ़न सँवारन जिन खेला सब खेल ।
सब कहँ टारि 'मुहम्मद', अब होइ रहा अकेल ॥२१॥

चालिस बरस जबहिं होइ जैहै । उठिहि मया, पछिले सब ऐहें ॥
मया मोह कै किरपा आए । आपहि काहिं आप फरमाए ॥
मैं संसार जो सिरजा एता । मोर नावँ कोई नहिं लेता ॥
जेतने परे सब सबहि उठावौं । पुलसरात कर पंथ रेंगावौं ॥
पाछे जिए पूछ्रौं अब लेखा । नैन माँह जेता हौं देखा ॥
जस जाकर सरवन मैं सुना । धरम पाप, गुन औगुन गुना ॥
कै निरमल कौसर अन्हवावौं । पुनि जीउन्ह बैकुंठ पठावौं ॥

मरन गँजन घन होइ जस, जस दुख देखत लोग ।
तस सुख होइ 'मुहम्मद', दिन दिन मानें भोग ॥२२॥

पहिले सेवक चारि जियाउब । तिन्ह सब काजै काज पठाउब ॥
जिबराइल औ मैकाईल । असराफील औ अजराईलू ॥
जिबरईल पिरथिवीं महुँ आए । आइ मुहम्मद कहँ गोहराए ॥

जिबराइल जग आइ पुकारब । नावँ मुहम्मद लेत हँकारब ॥
 होइहैं जहाँ मुहम्मद नाऊँ । कहउ लाख बोलिहैं एक ठाऊँ ॥
 बूढत रहै, कहहूँ नहिं पावै । फिरि कै जाइ मारि गोहरावै ॥
 कहै "गोसाईं! कहाँ वै पावौं । लखन बोलै जौ रे बोलावौं ॥

सब धरती फिरि आएउँ, जहाँ नावँ सो लेउँ ।
 लाखन उठै 'मुहम्मद', केहि कहँ उत्तर देउँ ? ॥२३॥

जिबराइल पुनि आयसु पावै । सूँघे जगत ठाँव सो पावै ॥
 बास सुबास लेउ हैं जहाँ । नाव रसूल पुकारसि तहाँ ॥
 जिबराइल फिरि पिरथिवीं आए । सूँघत जगत ठाँव सो पाए ॥
 उठहु मुहम्मद, होहु बड़ नेगी । देन जोहार बोलावहिं बेगी ॥
 बेगी हँकारेउ उमत समेता । आवहु तुरत साथ सब लेता ॥
 एतने बचन ज्योंहि मुख काढे । सुनत रसूल भए उठि ठाढ़े ॥
 जहँ लागि जीउ मुकहि सब पाए । अपने अपने पिंजरे आए ॥

कइउ जुगन के सोवत उठे लोग मनो जागि ।
 अस सब कहैं 'मुहम्मद', नैन पलक ना लागि ॥२४॥

उठत उमत कहँ आलस लागै । नींद भरी सोवत नहिं जागै ॥
 पौढत बार न हम कहँ भएऊ । अबहिन अवधि आइ कब गएऊ ॥
 जिबराइल तब कहब पुकारी । अबहूँ नींद न गई तुम्हारी ॥
 सोवत तुमहिं कइउ जुग बीते । ऐसे तौ तुम मोहे, न चीते ॥
 कइउ करोरि बरस भुईं परे । उठहु न बेगी मुहम्मद खरे ॥
 सुनि कै जगत उठिहि सब झारी । जेतना सिरजा पुरुष औ नारी ॥
 नाँगा नाँग उठिहै संसारू । नैना होइहैं सब के तारू ॥

कोइ न केहु तन हेरै, दिस्टि सरग सब केरि ।
 ऐसे जतन 'मुहम्मद', सिस्टि चलै सब घेरि ॥२५॥

पुनि रसूल जैहैं होइ आगे । उम्मत चलि सब पाछे लागै ॥
 अंध गियान होइ सब केरा । ऊँच नीच जहँ होइ अभेरा ॥
 सबही जियत चहैं संसारा । नैनन नीर चलै असरारा ॥
 सो दिन सँवरि उमत सब रोवै । ना जानौं आगे कस होवै ॥
 जो न रहै, तेहि का यह संगी मुख सूखै तेहि पर यह दंगी ॥
 जेहि दिन कहँ नित करत डरावा । सोइ दिवस अब आगे आवा ॥
 जौ पै हमसे लेखा लेवा । का हम कहब, उतर का देवा ॥

एत सब सँवरि कै मन महँ चहैं जाइ सो भूलि ।
 पैगहि पैग 'मुहम्मद', चित्त रहै सब झुलि ॥२६॥

पुल सरात पुनि होइ अभेरा । लेखा लेब उमत सब केरा ॥
 एक दिसि बैठि मुहम्मद रोइहैं । जिबरईल दूसर दिसि होइहैं ॥
 वार पार किछु सूझत नाहीं । दूसर नाहिं, को टैके बाहीं? ॥
 तीस सहस्र कोस कै बाटा । अस साँकर जेहि चलै न चाँटा ॥
 बारहु तें पतरा अस झीना । खडग धार से अधिकौ पैना ॥
 दोउ दिसि नरक कुंड हैं भरे । खोज न पाउब तिन्ह महुँ परे ॥
 देखत काँपे लागै जाँघा । सो पथ कैसे जैहै नाँघा ॥

तहाँ चलत सब परखब, को रे पूर, को ऊन ।
 अबहिं को जान 'मुहम्मद', भरे पाप औ पून ॥२७॥

जो धरमी होइहि संसारा । चमकि बीजु अस जाइहि पारा ॥
 बहुतक जनों तुरंग भल धइहैं । बहुतक जानु पखेरु उडइहैं ॥
 बहुतक चाल चलै महुँ जइहैं । बहुतक मरि मरि पावँ उठइहैं ॥
 बहुतक जानु पखेरु उडइहैं । पवन कै नाई तेहि महुँ जइहैं ॥
 बहुतक जानौं रेंगहिं चाँटी । बहुतक बहैं दाँत धरि माटी ॥
 बहुतक नरक कुंड महुँ गिरहीं । बहुतक रकत पीब महुँ परहीं ॥
 जेहि के जाँघ भरोस न होई । सो पंथी निभरोसी रोई ॥

परै तरास सो नाँघत, कोइ रे वार, कोइ पार ।
 कोइ तिर रहा 'मुहम्मद', कोइ बूडा मझधार ॥२८॥

लौटि हँकारब वह तब भानू । तपै कहैं होइहि फरमानू ॥
 पूछब कटक जेता है आवा । को सेवक, को बैठे खावा ॥
 जेहि जस आउ जियन मैं दीन्हा । तेहि तस चाहौं लीन्हा ॥
 अब लगि राज देस कर भूजा । अब दिन आइ लेखा कर पूजा ॥
 छः मास कर दिन करौं आजू । आउ क लेउँ औ देखौं साजू ॥
 से चौराहै बैठे आव । एक एक जन कँ पूछि पकरावै ॥
 नीर खीर हुँत काढब छानी । करब नितार दूध और पानी ॥

धरम पाप फरियाउब, गुन औगुन सब दोख ।
 दुखी न होहु 'मुहम्मद', जोखि लेब धरि जोख ॥२९॥

पुनि कस होइहि दिवस छ मासू । सूरुज आइ तपहिं होइ पासू ॥
 कै सउँहैं नियरे रथ हाँके । तेहिके आँच गूद सिर पाकै ॥
 बजरागिनि अस लागै तैसे । बिलखैं लोग पियासन बैसे ॥
 उनै अगिन अस बरसै घामू । भूँज देह, जरि जावै चामू ॥
 जेइ किछु धरम कीन्ह जग माँहा । तेहि सिर पर किछु आवै छाहाँ ॥
 धरिमिहि आनि पियाउब पानी । पापी बपुरहि छाहँ न पानी ॥
 जो राजता सो काज न आवै । इहाँ क दीन्ह उहाँ सो पावै ॥

जो लखपती कहावै, लहैन कोड़ी आधि ।
चौदह धजा 'मुहम्मद', ठाढ़ करहिं सब बाँधि ॥३०॥

सवा लाख पैगंबर जेते । अपने अपने पाएँ तेते ॥
एक रसूल न बैठहिं छाहाँ । सबही धूप लेहिं सिर माहाँ ॥
घामै दुखी उमत जेहि केरी । सो का मानै सुख अवसेरी ॥
दुखी उमत तौ पुनि मैं दुखी । तेहि सुख होइतौ पुनि मैं सुखी ॥
पुनि करता कै आयसु होई । उमत हँकारु लेखा मोहिं देई ॥
कहब रसूल कि आयसु पावों । पहिले सब धरमी लै आवों ॥
होइ उतर 'तिन्ह हों ना चाहों । पापी घालि नरक महँ बाहों ॥

पाप पुत्रि कै तखरी होइ चाहत है पोच ।
अस मन जानि 'मुहम्मद', हिरदै मानेउ सोच ॥३१॥

पुनि जैहैं आदम के पासा । 'पिता! तुम्हारि बहुत मोहिं आसा ॥
उमत मोरि गाढ़े है परी । भा न दान, लेखा का धरी ॥
दुखिया पूत होत जो अहै । सब दुख पै बापै सों कहै ॥
बाप बाप कै जो कछु खाँगै । तुमहिं छाँडि कासों पुनि माँगै ॥
तुम जठेर पुनि सबहिन्ह केरा । अहै सतति ,मुख तुम्हरै हेरा ॥
जेठ जठेर जो करिहैं मिनती । ठाकुर तबहीं सुनिहैं मिनती ॥
जाइ देउ सों बिनवौ रोई । मुख दयाल दाहिन तोहि होई ॥

कहहु जाइ जस देखेउ, जेहि होवे उदघाट ।
बहु दुख दुखी 'मुहम्मद', बिधि! संकट तेहि काट' ॥३२॥

सुनहु पूत! आपन दुख कहऊँ । हों अपने दुख बाउर रहऊँ ॥
होइ बैकुंठ जो आयसु ठेलेउँ । दूत के कहे मुख गोहूँ मेलेउ ॥
दुखिया पेट लागि सँग धावा । काढि बिहिस्त से मैल ओढावा ॥
परल जाइ मंडल संसारा । नैन न सूझे, निसि अधियारा ॥
सकल जगत मैं फिरि फिरि रोवा । जीउ अजान बाँधि कै खोवा ॥
भाएँ उजियार पिरथिवीं जइहों । औ गोसाईं कै अस्तुति कहिहों ॥
लौटि मिलै जौ हौवा आई । तौ जिउ कहँ धीरझ होइ जाई ॥

तेहि हुँत लाजि उठै जिउ, मुहँ न सकों दरसाइ ।
सो मुह लेइ मुहम्मद! बात कहों का जाइ? ॥३३॥

पुनि जैहैं मूसा क दोहाई । ऐ बंधू! मोहिं उपकरू आई ॥
तुम कहँ बिधिना आयसु दीन्हा । तुम नेरे होइ बातें कीन्हा ॥
उम्मत मोरि बहुत दुख देखा । भा न दान, माँगत है लेखा ॥
अब जौ भाइ मोर तुम अहौ । एक बात मोहिं कारन कहौ ॥
तुम अस ठटै बात का कोई । सोई कहीं बात जेहि होई ॥

गाढे मीत ! कहौं का काहू । कहहु जाइ जेहि होइ निबाहू ॥
तुम सँवारि कै जानहु बाता । मकु सुनि माया करै बिधाता ॥

मिनती करहु मोर हुँत, सीस नाइ कर जोरि।
हा हा करै 'मुहम्मद', उमत दुखी है मोरि ॥३४॥

सुनहु रसूल बात का कहौं । हौं अपने दुख बाउर रहौं ॥
कै कै देखेउँ बहुत ढिठाई । मुँह गरुवाना खात मिठाई ॥
पहिले मो कहँ आयसु दीन्हा । फरऊँ से मैं झगरा कीन्हा ॥
रोधि नील क डारेसि झुरा । फुर भा झूठ, झूठ भा फुरा ॥
पुनि देखै बैकुंठ पठाएउ । एकौ दिसि कर पंथ न पाएउँ ॥
पुनि जो मो कहँ दरसन भएऊ । कोह तूर रावट होइ गएऊ ॥
भाँति अनेक मैं फिर फिर जापा । हर दावँन कै लीन्हेसि झाँपा ॥

निरखि नैन मैं देखौं, कतहुँ परै नहिँ सूझि ।
रहौ लजाइ, मुहम्मद! बात कहौं का बूझि'?॥३५॥

दौरि दौरि सबही पहुँ जैहैं । उतर देइ सब फिरि बहरैहैं ॥
ईसा कहिन कि कस ना कहत्योँ । जौ किछु कहे क उत्तर पवत्योँ ॥
मैं मुए मानुस बहुत जियावा । औ बहुतै जिउ दान दियावा ॥
इब्राहिम कह, कस ना कहत्योँ । बात कहे बिन मैं ना रहत्योँ ॥
मोसौं खेलु बंधु जो खेला । सर रचि बाँधि अगिन महँ मेला ॥
तहाँ अगिन हुँत भइ फुलवारी । अपडर डरौं, न परहिँ सँभारी ॥
नूह कहिन, जप परलै आवा । सब जग बूड, रहेउँ चढि नावा ॥

काह कहै कहि... से, सबै ओढाउब भार ॥
जस कै बैन मुहम्मद, करू आपन निस्तार ॥३६॥

सबै भार अस ठेलि ओढाउब । फिर फिर कहव, उतर ना पाउब ॥
पुनि रसूल जैहै दरबारा । पैग मारि भुइँ करब पुकारा ॥
तै सब जानसि एक गोसाईं । कोइ न आव उमत के ताई ॥
जेहि सौ कहौं सो चुप होइ रहै । उमत लाइ केहु बात न कहै ॥
मोहिँ अस तहीं लाग करतारा । तोहिँ होइ भल सोइ निस्तारा ॥
जो दुख चहसि उमत कहँ दीन्हा । सो सब मैं अपने सिर लीन्हा ॥

लेखि जोखि जो आवै मरन गँजन दुख दाहु ।
सो सब सहै 'मुहम्मद', दुखी कर जनि काहु ॥३७॥

पुन रिसाइ कै कहै गोसाईं । फातिम कहँ ढूँढहु दुनियाई ॥
का मोसौं उन झगर पसारा । हसन हुसैन कहौ को मारा ॥
ढूँढे जगत कतहुँ ना पैहैं । फिरि कै जाइ मारि गोहरैहैं ॥

ढूँढि जगत दिनिया सब आएँ । फातिम खोज कतहुँ ना पाएँ ॥
 आयसु होइ, अहँ पुनि कहँ । उठा नाद हँ धरती महँ ॥
 मूँदै नैन सकल संसारा । बीबी उठै, करै निस्तारा ॥
 जो कोई देखै नैन उघारी । तेहि कहँ छार करौं धरि जारी ॥

आयसु होइहि देउ कर , नैन रहै सब झाँपि ॥
 एक ओर डरै 'मुहम्मद', उमत मरै डरि काँपि ॥३८ ॥

उठिन बीबी तब रिस किहें । हसन हुसेन दुवौ सँग लीहें ॥
 तैं करता हरता सब जानसि । झूँटै फुरै नीक पहिचानसि ॥
 हसन हुसेन दुवौ मोर वारे । दुनहु यजीद कौन गुन मारे ? ॥
 पहिले मोर नियाव निबारू । तेहि पाछे जेतना संसारू ॥
 समुझें जीउ आगि महुँ दहऊँ । देहु दादि तौ चुप के रहऊँ ॥
 नाहि त देउँ सराप रिसाई । मारौं आहि अर्श जरि जाई ॥

बहु संताप उठै निज, कैसहु समुझि न जाइ ।
 बरजहु मोह 'मुहम्मद', अधिक उठै दुख दाइ ॥३९॥

पुनि रसूल कहँ आयसु होई । फातिम कहँ समुझावहु सोई ॥
 मारै आहि अर्श जरि जाई । तेहि पाछे आपुहि पछितार्ई ॥
 जो नहिं बात क करै बिषादू । जानौ मोहिं दीन्ह परसादू ॥
 जो बीबी छाँड़हिं यह दोखू । तौ मैं करौं उमत के मोखू ॥
 नाहिं न घालि नरक महुँ जारौं । लौटि जियाइ मुए पर मारौं ॥
 अग्रि खंभ देखहु जस आगे । हिरकत छार होइ तेहि लागे ॥
 चहुँ दिसि फेरि सरग लै लावौं । मँगरन्ह मारौं, लोह चटावौं ॥

तेहि पाछे धरि मारौं, घालि नरक के काँठ ।
 बीबी कहँ समुझावहु, जौ रे उमत कै चाँट ॥४०॥

पुनि रसूल तलफत तहुँ जैहें । बीबिहि बार बार समुझैहें ॥
 बीबी कहब, 'घाम कत सहहू कस ना बैठि छाहँ महुँ रहहू ॥
 सब पैगंबर बैठे छाहाँ । तुम कस तपौ बजर अस माहाँ ॥
 कहब रसूल छाँह का बैठौ ? उमत लागि धूपहु नहिं बैठौ ॥
 तिन्ह सब बाँधि घाम महुँ मेले । का भा मोरे छाहँ अकेले ॥
 तुम्हरे कोह सबहि जो मरै । समुझहु जीउ, तबहि निस्तरै ॥
 जो मोहिं चहौ निवारहु कोहू । तब बिधि करै उमत पर छोहू ॥

बहु दुख देखि पिता कर, बीबी समुझा जीउ ।
 जाइ मुहम्मद बिनवा , ठाढ़ पाग कै गीउ ॥४१॥

तब रसूल के कहें भइ माया । जिन चिंता मानहु, भइ दाया ॥
 जौ बीबी अबहूँ रिसियाई । सबहि उमत सिर आइ बिसाई ॥
 अब फातिम कहूँ बेगि बोलावहु । देइ दाद तौ उमत छोड़ावहु ॥
 फातिम आइ कै पार लगावा । धरि यजीद दोजख महँ गवा ॥
 अंत कहा, धरि जान से मारै । जिउ देइ देइ पुनि लौटि पछारै ॥
 तस मारब जेहि भुइँ गडि जाई । खन खन मारै लौटि जियाई ॥
 बजर-अग्नि जारब कै छारा । लौटि दहै जस दहै लोहारा ॥

मारि मारि घिसियावैं, धरि दोजख महँ देब ।
 जेतनी सिस्टि 'मुहम्मद', सबहि पुकारै लेब ॥४२॥

पुनि सब उम्मत लेब बुलाई । हरू गरू लागब बहिराई ॥
 निरखि रहौती काढब छानी । करब निनार दूध औ पानी ॥
 बाप क पूत, न पूत क बापू । पाइहि तहाँ न पुन्नि न पापू ॥
 आपहि आप आइकै परी । कोउ न कोउ क धरहरि करी ॥
 कागज काढि लेब सब लखा । दुख सुख जो पिरथिवी महँ देखा ॥
 पुन्नि पियाला लेखा माँगब । उतर देत उन पानी खाँगब ॥
 नैन क देखा स्रवन क सुना । कहब, करब, औगुन औ गुना ॥

हाथ, पाँव, मुख, काया, स्रवन, सीस औ आँखि ।
 पाप न चपै 'मुहम्मद' आइ भरें सब साखि ॥४३॥

देह क रोवाँ बैरी होइहैं । बजर-बिया एहि जीउ के बोइहैं ॥
 पाप पुन्नि निरमल कै धोउब । राखब पुन्नि, पाप सब खोउब ॥
 पुनि कौसर पठउब अन्हवावै । जहाँ कया निरमल सब पावै ॥
 बुडकी देब देह सुख लागी । पलुहब उठि, सोवत अस जागी ॥
 खोरि नहाइ धोइ सब दुंदू । होइ निकरहिं पूनिउ कै चंदू ॥
 सब क सरीर सुबास बसाई । चंदन कै अस घानी आई ॥
 झूठे सबहि, आप पुनि साँचे । सबहि नबी के पाछे बाँचे ॥

नबिहि छाडि होइहि सबहि बारह बरस क राह ।
 सब अस जान 'मुहम्मद', होइ बरस कै राह ॥४४॥

पुनि रसूल नेवतब जेवनारा । बहुत भाँति होइहि परकारा ॥
 ना अस देखा, ना अस सुना । जौ सरहौं तौ है दस गुना ॥
 पुनि अनेक बिस्तर तहँ डासब । बास सुबास कपूर से बासब ॥
 होइ आयसु जौ बेगि बोलाउब । औ सब उमत साथ लेइ आउब ॥
 जिबरईल आगे होइ जइहैं । पग डारै कहँ आयसु देइहैं ॥
 चलब रसूल उमत लेइ साथी । परग परग पर नावत माथा ॥
 'आवहु भीतर' बेगि बोलाउब । बिस्तर जहाँ तहाँ बैठाउब ॥

झारि उमत सब बैठी जोरि कै एकै पाँति ।
सब के माँझ 'मुहम्मद', जानौ दुलह बराति ॥४५॥

पुनि जेवन कहँ आवै लागैं । सब के आगे धरत न खाँगै ॥
भाँति भाँति कर देखब थारा । जानब ना दहुँ कौन प्रकारा ॥
पुनि फरमाउब आप गोसाईं । बहुतै दुख देखेउ दुनियाई ॥
हाथन्ह से जेवन मुख डारत । जीभ पसारत दाँत उघारत ॥
कूँचत खात बहुत दुख पाएउ । तहँ ऐसै जेवनार जेवाँएउ ॥
अब जिन लौटि कस्ट जिउ करहू । सुख सवाद औ इंद्री भरहू ॥
पाँच भूत आतमा सेराई । बैठि अघाउ, उदर ना भाई ॥

ऐस करब पहुनाई, तब होइहि संतोख ।
दुखी न होहु 'मुहम्मद', पोखि लेहु फुर पोख ॥४६॥

हाथन्ह से केहु कौर न लेई । जोइ चाह मुख पैठे सोई ॥
दाँत,जीभ,मुख किछु न डोलाउब । जस जस रुचिहै तस तस खाउब ॥
जैस अन्न बिनु कूँचै रूचै । तैस सिठाइ जौ कोऊ कूँचै ॥
एक एक परकार जो आए । सत्तर सत्तर स्वाद सो पाए ॥
जहँ जहँ जाइ के परै जुडाई । इच्छा पूजै, खाइ अघाई ॥
अनचखे रअते फर चाखा । सब अस लेइ अपरस रस चाखा ॥
जलम जलम कै भूख बुझाई । भोजन केरे साथै जाई ॥

जेवन अँचवन होइ पुनि, पुनि होइहि खिलवान ।
अमृत भरा कटोरा पियहु 'मुहम्मद' पान ॥४७॥

एक तौ अमृत बास कपूरा । तेहि कहँ कहाँ शराब-तहूरा ॥
लागब भरि भरि देइ कटोरा । पुरुष ज्ञान अस भरै महोरा ॥
ओहि कै मिठाइ माति एक दाऊँ । जलम न मानव होइ अब काहूँ ॥
सचु मतवार रहब होइ सदा । रहसै कूदै सदा सरबदा ॥
कबहुँ न खोवै जलम खुमारी । जनौ बिहान उठै भरि बारी ॥
ततखन बासि बासि जनु घाला । घरी घरी जस लेब पियाला ॥
सबहि क भा मन सो मद पिया । नव औतार भवा औ जिया ॥

फिरै तँबोल, मया से कहब अपुन लेइ खाहु ।
भा परसाद 'मुहम्मद', उठि बिहिस्त महँ जाहु ॥४८॥

कहब रसूल 'बिहिस्त न जाऊँ । जौ लगि दरस तुम्हार न पाऊँ ।
उघर न नैन तुमहिं बिनु देखे । सबहि अँविरथा मोरे लेखे ॥
तौ लै केहु बैकुंठ न जाई । जझौ लै तुम्हरा दरस न पाई ॥
करु दीदार, देखौँ मै तोहीं । तौ पै जीउ जाइ सुख मोहीं ॥
देखें दरस नैन भरि लेऊँ । सीस नाइ पै भुईँ कहँ देऊँ ॥
जलम मोर लागा सब थारा । पलुहै जीउ जो गीउ उभारा ॥

होइ दयाल करु दिस्टि फिरावा । तोहि छाँडि मोहि और न भावा ॥

सीस पायँ भुइँ लावौं, जौ देखौं तोहि आँखि ।
दरसन देखि मुहम्मद , हिये भरौं तोरि साखि ॥४९॥

सुनहु रसूल ! होत फरमानू । बोल तुम्हार कीन्ह परमानू ॥
तहाँ हुतेउँ जहँ हुतेउ न ठाऊँ । पहिले रचेउँ मुहम्मद नाऊँ ॥
तुम बिनु अबहुँ न परगट कीन्हेंउँ । सहस अठारह कहँ जिउ दीन्हेउँ ॥
चौदह खंड ऊपर तर राखेउँ । नाद चलाइ भेद बहु भाखेउँ ॥
चार फिरिस्तन बड औतारेउँ । सात खंड बैकुंठ सँवारेउँ ॥
सवा लाख पैगंबर सिरजेउँ । कर करतूति उन्हहि धै बँधेउँ ॥
औरन्ह कर आगे कत लेखा । जेतना सिरजा को ओहि देखा ॥

तुम तहँ एता सिरजा, आप कै अंतरहेत ।
देखहु दरस 'मुम्मद' ! आपनि उमत समेत ॥५०॥

सुनि फरमान हरष जिउ बाढ़े । एक पाँव से भए उठि ठाढ़े ॥
झारि उमत लागी तब तारी । जेता सिरजा पुरुष औ नारी ॥
लाग सबन्ह सहुँ दरसन होई । ओहि बिनु देखे रहा न कोई ॥
एक चमकार होइ उजियारा । छपै बीजु तेहि के चमकारा ॥
चाँद सुरुज छपिहँ बहु जोती । रतन पदारथ मानिक मोती ॥
सो मनि दिपें जो कीन्हि थिराई । छपा सो रंग गात पर आई ॥
ओहु रूप निरमल होइ जाई । और रूप ओहि रूप समाई ॥

ना अस कबहुँ देखा, ना केहू ओहि भाँति ।
दरसन देखि 'मुहम्मद', मोहि परे बहु भाँति ॥५१॥

दुइ दिन लहि कोउ सुधि न सँभारे । बिनु सुधि रहे, न नैन उघारे ॥
तिसरे दिन जिबरैल जौ आए । सब मदमाते आनि जगाए ॥
जे हिय भेदि सुदरसन राते । परे परे लोटैं जस माते ॥
सब अस्तुति कै करै बिसेखा । ऐस रूप हम कतहुँ न देखा ॥
अब सब गएउ जलम दुख धोई । जो चाहिय हठि पावा सोई ॥
अब निहचिंत जीउ विधि कीन्हा । जौ पिय आपन दरसन दीन्हा ॥
मन कै जेति आस सब पूजी । रही न कोई आस गति दूजी ॥

मरन, गँजन औ परिहँस, दुख, दलिद्र सब भाग ।
सब सुख देखि 'मुहम्मद', रहस कूद जिउ लाग ॥५२॥

जिब अइल कहँ आयसु होइहि । अछरिन्ह आइ आगे पय जोइहिं ॥
उमत रसूल केर बहिराउव । कै असवार बिहिस्त पहुँचाउव ॥
सात बिहिस्त बिधिने औतारा । औ आठई शदाद सँवारा ॥
सो सब देवउमत कहँ बाँटी । एक बराबर सब कहँ आँटी ॥

एक एक कहँ दीन्ह निवासू । जगत-लोक विरसैं कबिलासू ॥
 चालिस चालिस हूरैं सोई । औ सँग लागि बियाही जोई ॥
 ओ सेवा कहँ अछरिन्ह केरी । एक एक जनि कहँ सौ सौ चेरी ॥

ऐसे जतन बियाहैं, जस साजै बरियात ।
 दूलह जतन मुहम्मद, बिहिस्त चले बिहँसात ॥५३॥

जिबराइल इतात कहँ धाए । चोल आनि उम्मत पहिराए ॥
 पहिरहु दगल सुरँग रँग राते । करहु सोहाग जनहु मद माते ॥
 ताज कुलह सिर मुहम्मद सोहै । चंद बदन औ कोकब मोहै ॥
 न्हाइ खोरि अस बनी बराता । नबी तँबोल खात मुख राता ॥
 तुम्हरे रुचे उमत सब आनब । औ सँवारि बहु भाँति बखानब ॥
 खडे गिरत मद-माते ऐहैं । चढि कै घोडन कहँ कुदरैहैं ॥
 जिन भरि जलम बहुत हिय जारा । बैठि पाँव देइ जमै ते पारा ॥

जैसे नबी सँवारे, तैसे बने पुनि साज ।
 दूलह जतन 'मुहम्मद', बिहिस्ति करैं सुख राज ॥५४॥

तानब छत्र मुहम्मद माथे । औ पहिरैं फूलन्ह बिनु गाँथे ॥
 दूलह जतन होब असवारा । लिए बरात जैहैं संसारा ॥
 रचि रचि अछरिन्ह कीन्ह सिंगारा । बास सुबास उठै महकारा ॥
 आज रसूल बियाहन ऐहैं । सब दुलहिन दूलह सहुँ नैहैं ॥
 आरति करि सब आगे ऐहैं । नंद सरोदन सब मिलि गैहैं ॥
 मँदिरन्ह होइहि सेज बिछावन । आजु सबहि कहँ मिलिहैं रावन ॥
 बाजन बाजै बिहिस्त दुवारा । भीतर गीत उठै इनकारा ॥

बनि बनि बैठीं अछरी , बैठि जोहैं कबिलास ।
 बेगहि आउ 'मुहम्मद', पूजै मन कै आस ॥५५॥

जिबराइल पहिले से जैहैं । जाइ रसूल बिहिस्त नियरैहैं ॥
 खुलिहैं आठौं पँवरि दुवारा । औ पैठे लागे असवारा ॥
 सकल लोग जब भीतर जैहैं पाछे होइ रसूल सिधैहैं ॥
 मिलि हूरैं नेवछावरि करिहैं । सबके मुखन्ह फूल अस झरिहैं ॥
 रहसि रहसि तिन करब किरीडा । अमर कुंकुमा भरा सरीरा ॥
 बहुत भाँति कर नंद सरोदू । बास सुबास उठै परमोदू ॥
 अगर, कपूर, बेना कस्तूरी । मँदिर सुबास रहब भरपूरी ॥

सोवन आजु जो चाहै, साजन मरदन होइ ।
 देहिं सोहाग 'मुहम्मद', सुख बिरसै सब कोइ ॥५६॥

पैठि बिहिस्त जौ नौनिधि पैहैं ।अपने अपने मँदिर सिधैहैं ॥
 एक एक मँदिर सात दुवारा । अगर चँदन के लाग केवारा ॥

हरे हरे बहु खंड सँवारे । बहुत भाँति दइ आपु सँवारे ॥
 सोने रूपै घालि उँचावा । निरमल कुहुँकुहुँ लाग गिलावा ॥
 हीरा रतन पदारथ जरे । तेहि क जोति दीपक जस बरै ॥
 नदी दूध अतरन कै बहहीं । मानिक मोति परे भुईँ रहहीं ॥
 ऊपर गा अब छाहँ सोहाई । एक एक खंड चहा दुनियाई ॥

तात न जूड न कुनकुन, दिवस राति नहि दुक्ख ।
 नींद न भूख मुहम्मद, सब बिरसैं अति सुक्ख ॥५७॥

देखत अछरिन केरि निकाई । रूप तें मोहि रहत मुरछाई ॥
 लाल करत मुख जोहब पासा । कीन्ह चहैं किछु भोग-बिलासा ॥
 हैं आगे बिनवैं सब रानी । और कहैं सब चेरिन्ह आनी ॥
 ए सब आवैं मोरे निवासा । तुम आगे लेइ आउ कबिलासा ॥
 जो अस रूप पाट परधानी । औ सबहिन्ह चेरिन्ह कै रानी ॥
 बदन जोति मनि माथे भागू । औ बिधि आगर दीन्ह सोहागू ॥
 साहस करै सिंगार सँवारी । रूप सुरूप पदमिनी नारी ॥

पाट बैठि नित जोहैं, बिरहन्ह जारैं माँस ।
 दीन दयाल, 'मुहम्मद', मानहु भोग विलास ॥५८॥

सुनहिँ सुरूप अबहिँ बहु भाँती । इनहिँ चाहि जो हैं रुपवाँती ॥
 सातौं पवँरि नघत तिन्ह पेखब । सातइँ आए सो कौकुत देखब ॥
 चले जाब आगे तेहि आसा । जाइ परब भीतर कबिलासा ॥
 तखत बैठि सब देखब रानी । जे सब चाहि पाट परधानी ॥
 दसन जोति उट्ठै चमकारा । सकल बिहिस्त होइ उजियारा ॥
 बारहबानी कर जो सोना । तेहि तें चाहि रूप अति लोना ॥
 निरमल बदन चंद कै जोती । सब क सरीर दिपैं जस मोती ॥

बास सुबास छुवै जेहि बेधि भँवर कहँ जात ।
 बर सो देखि 'मुहम्मद', हिरदै महुँ न समात ॥५९॥

पैग पै जस जस नियराउब । अधिक सवाद मिलै कर पाउब ॥
 नैन समाइ रहै चुप लागे । सब कहँ आइ लेहिँ होइ आगे ॥
 बिसरहु दूलह जोबन बारी । पाएउ दुलहिन राजकुमारी ॥
 एहि महुँ सो कर गहि लेइ जैहैं । आधे तखत पै लै बैठैहैं ॥
 सब अछूत तुम कहँ भरि राखे । महै सवाद होइ जौ चाखै ॥
 नित पिरीत, नित नव नव नेहु । नित इठि चौगुन होइ सनेहु ॥
 नितइ नित जो बारि बियाहै । बीसौ बीस अधिक ओहिँ चाहै ॥

तहाँ त मीचु, न नींद, दुख, रह न देह महुँ रोग ।
 सदा अनँद 'मुहम्मद', सब सुख मानैं भोग ॥६०॥